

२८

विविधतीर्थकल्पे

## १७. सत्यपुरतीर्थकल्पः ।

पणमिय सिरिवीरजिणं देवं सिरिबंभसंतिकयसेवं । सच्चउरतिथकप्पं जहासुअं किं पि जंपेमि ॥ १ ॥  
सिरिकन्नउज्जनरवइकारिअजिणभवणि देवदारुमए । तेरसवच्छरसइए वीरजिणो जयउ सच्चउरे ॥ २ ॥

इहेव जंबुद्वीवे दीवे भारहे वासे मरुमंडले सच्चउरं नाम नयरं । तत्थ नाहडरायकारिअं सिरि-  
5 जज्जिगसूरिगणहरपइड्डिअं पित्तलामयं सिरिवीरबिंबं चेईहरे अच्छइ । कहं नाहडराएण तं कारिअं ति तस्स उप्पत्ति  
भण्णइ—पुबिं नड्डूलमंडल<sup>1</sup>मंडणमंडोवरनयरस्स सामिं रायाणं बलवंतेहिं <sup>2</sup>दाइएहिं मारिऊण तं नयरं अहिड्डिअं ।  
तस्स रण्णो महादेवी आवन्नसत्ता पलाइत्ता बंभाणपुरं पत्ता । तत्थ य सयल्लक्खणसंपुन्नं दारयं पसूआ । तओ नय-  
राओ बाहिं एगत्थ रुक्खे तं बालयं झोलिआगयं ठावित्ता सयं तप्पासदेसे ठिया किंचि कम्मं काउमाढत्ता । तत्थ य  
दिबजोगेण समागया सिरिजज्जिगसूरिणो । तरुच्छायं अपरावत्तमाणिं दट्टूण ‘एस पुण्णवंतो भावि’ ति कलिऊण चिरं  
10 अवलोइंता अच्छिआ । तीए रायपत्तीए आगंतूण भणिआ सूरिणो—भवयं ! किं एस दारओ कुलक्खणो कुलक्खयकारो  
दीसइ ? । सूरीहिं वुत्तं—भइे ! एस महापुरिसो भविस्सइ । ता सबपयत्तेण पालणिज्जो । तओ सा अणुकंपाए चेईहर-  
चिन्ताकरणे निउत्ता गुरुहिं । सो अ दारओ कयनाहडनामो गुरुमुहाओ पंचपरमिट्टिनमुक्कारं सिक्खिओ । सो अ  
चवलत्तेण गहिअधणुसरो अक्खयपट्टयस्स उवारिं आगच्छंते मूसए अमूढलक्खो मारेइ । तओ सावएहिं चेईहराओ  
निक्कालिओ जणाणं गावीओ रक्खेइ । अन्नया केणावि जोगिणा पुरवाहिरे भमंतेण सो दिट्ठो । बत्तीसलक्खणधरो ति  
15 विन्नाओ<sup>3</sup> । तओ तेण सुवण्णपुरिससाहणत्थं तमणुगच्छंतेण तस्स मायरं अणुणविय तत्थेव ठिई कया । तओ अवसरे  
तेण जोगिणा भणिओ नाहडो—जत्थ गावीरक्खणाइं कुणंतो रत्तदुद्धं कुलिसतरं पाससि तत्थ चिण्हं काऊण ममं  
कहिज्जासि । बालेण तह ति पडिबन्नं । अन्नया दिबजोएण तं दट्टूण जाणाविअं जोगिणो । दोवि गया तत्थ । तओ  
जहुत्तविहाणेण अग्गिं पज्जालिऊण तं रत्तच्छीरं तत्थ पक्खिवित्ता जोगिंमि पयाहिणं दिंते नाहडेणावि पयक्खिणी-  
कओ अग्गी । कहिंचि जोगिणो दुड्डचित्तवित्तिं नाऊण रायपुत्तेण सुमरिओ पंचनमुक्कारो । तप्पभावेण जोगी अप्पह-  
20 वंतो उक्खिविअ जलणे खित्तो नाहडेण । जाओ सुवण्णपुरिसो । तओ चिंतिअं तेण—अहो मंतस्स माहप्पं । कहं  
तु तेसिं गुरुणं एयस्स दायगाणं पच्चुबयरिस्सामि ति—आगंतुं पणया गुरुणो । सबं च तं सरूवं विण्णत्तं, किच्चं च  
आइसह ति भणिए, गुरुवयणाओ उत्तुंगाइं चउवीसं चेईयाइं कारिआइं । कमेण पत्तो पउरं रज्जसिरिं । सेन्नसंभारेण  
गंतुं गहिअं पेइअं सट्ठणं । अन्नया विन्नत्ता सिरिजज्जिगसूरिणो तेण, जहा—भगवं ! तं किंचि कज्जं आइसह, जेण  
तुम्हाणं मज्झ य कित्ती चिरकालं पसरइ ति । तओ गुरुहिं धेणू चउहिं थणेहिं जत्थ खीरं शरइ तं भूमिं अब्भुदय-  
25 करं नाऊण तं ठाणं दंसिअं रण्णो । तेणं गुरुआएसेणं सच्चउरे वीरमुक्खाओ छवाससएहिं महंतं कारिअं अब्भंलिह-  
सिहरं चेइअं । तत्थ पइट्ठाविआ पित्तलमई सिरिमहावीरपडिमा जज्जिगसूरीहिं । जया पइट्ठाकरणत्थं आयरिआ  
पट्टिआ तथा अंतराले एगम्मि उत्तमलग्गे वहमाणे नाहड<sup>4</sup>रायपुवपुरिसस्स विंझरायस्स आसारूढस्स मुत्तीए पइट्ठा  
कया । बीयम्मि लग्गे लग्गविसेसाओ मयणमइ ब महीए जायाए संखनामचिल्लएण गुरुआएसाओ दंडघाएण कूवओ  
कओ । अज्ज वि संखकूवओ भण्णइ । सो अ अण्णया सुक्को वि वइसाहपुण्णिमाए पाणीएण भरिज्जइ । तईए  
30 लग्गे वीरसामी पइड्डिओ । जम्मि अ लग्गे वीरस्स पइट्ठा कया तम्मि चेव लग्गे दुग्गासूअग्गामे वयणप-  
ग्गामे य दुण्णि वीरपडिमाओ साहु-सावयहत्थपेसिअवासेहिं पइड्डिआओ । तं च वीरपडिमं निच्चमच्चैइ राया । एवं  
नाहडराएणं तं बिंबं कारिअं ।

1 ‘मंडल’ नास्ति A आदर्शे । 2 B दाएहिं । 3 A विन्नासिओ; C विजिसिओ; P b विन्नसिओ । 4 ACP नायड<sup>0</sup> ।

## सत्यपुरतीर्थकल्पः ।

२९

तं च **बंभसंति** जकखेण सन्निहिअपाडिहेरेण अहोनिर्सिं पज्जुवासिज्जइ । सो अ पुबिं **धणदेव**सिद्धिणो<sup>†</sup> वसहो आसि । तेण **वेगवईए** नईए पंचसयसगडभरो कड्ढिओ । सो तुट्ठो । तओ सिद्धिणा<sup>†</sup> चारिजलाइहेउं वेयणं दाऊण **वट्टमाण**गामवासिलोयाणं समप्पिओ । ते य गामिल्लया गहियरित्था तस्स वसहस्स चितं पि न कुणंति । तओ सो अकामनिज्जराए मरिऊण वंतरेसु **सूलपाणी** नाम जकखो जाओ । विभंगनाणं पउंजिअ विण्णायपुब्वजम्म-वइयरो तम्मि गामे बद्धमच्छरो मारिं विउवेइ । तओ अहण्णो गामो ण्हाउं कयवलिकम्मो धुअकडच्छुअहत्थो 5 भणइ—जस्स देवस्स दाणवस्स वा अम्हेहिं किं पि अवरद्धं सो मरिसेउ त्ति । तओ तेण जकखेण पुब्वभववसहस्स वुत्ततो कहिओ । तस्सेव वसहस्स अट्ठिपुंजोवरिं देउलं लोएहिं कयं । तस्स पडिमा कारिआ । **इंदु**सम्मो देवच्चओ ठविओ । तओ सो **वट्टमाण**गामो **अट्ठिअगामु** त्ति पसिद्धो । जायं सिवं । कमेणं **दूइज्जंतग**तावसासमाओ भयवं **वट्टमाण**सामी छउमत्थविहारेणं विहरंतो वासारत्ते तत्थ गामे पत्तो । गाममणुत्तविअ तत्थेव देवउले रयणीए काउ-स्सग्गे ठिओ । तेण मिच्छदिद्धिणा सुरेण भीमट्टहास-हत्थि-पिसाय-नागरूवेहिं उवसग्गित्ता सिर-कन्न-नासा-दंत-नह-5च्छि-10 पिद्धि-वियणाओ विउबियाओ<sup>†</sup> । सबत्थ भयवंतमकखोभं नाऊण सो उवसंतो गीय-नट्ट-थुइमाईहिं पज्जुवासेइ । तप्पभिइ तस्स जकखस्स **बंभसंति** त्ति नाम रूढं । सो य **सच्चउर-वीर**चेईए पइट्ठाविसेसेण निवसइ ।

इओ अ **गुज्जर**धराए पच्छिमभागे **वलहि** त्ति नयरी रिद्धिसमिद्धा । तत्थ **सिलाइच्चो** नाम राया । तेण य रयणजडिअकंकसीलुद्धेण **रंकओ** नाम सिद्धी पराभूओ । सो अ कुविओ तब्विग्गहणत्थं **गज्जणवइहम्मरी**स्स पभूअं धणं दाऊण तस्स महंतं सेन्नं आणेइ । तम्मि अवसरे **वलही**ओ **चंदप्पह**सामिपडिमा **अंबा-खित्तवाल**जुत्ता 15 अहिट्ठायगबलेण गयणपहेण **देवपट्टणं** गया । रहाहिरूढा य देवयाबलेण **वीर**नाहपडिमा अदिट्टवत्तीए संचरंती आसो-यपुण्णिमाए **सिरिमालं** पुरमागया । अण्णे वि साइसया देवा जहोचियं ठाणं गया । पुरदेवयाए य सिरि**वट्टमाण-**सूरीणं उप्पाओ जाणाविओ—जत्थ भिक्खालद्धं खीरं रुहिरं होऊण पुणो खीरं होहिइ तत्थ साहूहिं ठायवं त्ति । तेण य सिन्नेण **विक्रमाओ** अट्ठहिं **सएहिं पणयालेहिं** ( ८४५ ) वरिसाणं गएहिं **वलहिं** भंजिऊण सो राया मारिओ । गओ सठाणं **हम्मरी**ओ । 20

तओ अन्नया, अन्नो **गज्जणवई गुज्जरं** भंजित्ता तओ वलंतो पत्तो **सच्चउरे दससयइक्कासीए** ( १०८१ ) **विक्रमवरिसे** मिच्छराओ । दिट्ठं तत्थ मणोहरं **वीर**भवणं । पविट्ठा हण हण त्ति भणिरा मिलक्खुणो । तओ गयवरे जुत्तित्ता<sup>†</sup> **वीर**सामी ताणिओ । लेसमित्तं पि न चलिओ सट्ठणाओ । तओ बइल्लेसु जुत्तिएसु पुब्वभवरारोण **बंभसंति**णा अंगुलचउकं चालिओ । सयं हकंते वि **गज्जणवइ**म्मि निच्चली<sup>†</sup>होउं ठिओ जगनाहो । जाओ विलक्खो मिलक्खुनाहो । तओ घणघाएहिं ताडिओ सामी । लगंति घाया ओरोहसुंदरीणं<sup>†</sup> । तओ खग्गपहारेसु विहलीभूएसु मच्छरेणं तुरुक्केहिं 25 **वीर**स्स अंगुली कट्ठिआ । तं गहिऊण य ते पट्ठिआ । तओ लग्गा<sup>†</sup> पज्जलिउं तुरयाणं पुच्छा । लग्गा य वलिउं<sup>†</sup> मिच्छाणं मुच्छा । तओ तुरए छड्ढित्ता<sup>†</sup> पायचारिणो चेव पयट्ठा, धस त्ति धरणीए पडिआ । **रहमाणं** सुमरंता विल-वंता दीणा खीणसबबला नहंगणे अदिट्टवाणीए भणिआ एवं—**वीर**स्स अंगुलिं आणित्ता तुम्हे जीवसंसए पडिआ । तओ **गज्जणा**हिवई विम्हिअमणो सीसं धुणंतो सिल्लारे आइसइ । जहा—एयमंगुलिं वलिऊण तत्थेव ठावेह । तओ भीएहिं तेहिं पच्चाणीया । सा लग्गा य<sup>†</sup> झड त्ति सामिणो करे । तमच्छेरं पिच्छिअ पुणो वि **सच्चउरं** पइ सउणं पि न 30 मगंति तुरुक्का । तुट्ठो चउबिहो वि समणसंघो । **वीर**भवणे पूआ-महिमा-गीय-नट्ट-वाइत्त-दविणदाणेहिं पभावणं करेइ ।

अन्नया बहुम्मि काले बोलीणे **मालवि**<sup>†</sup>चयनरिंदो **गुज्जरधरं** भंजिऊण **सच्चउर**सीमाए पहुत्तो । तओ

†.† एतदन्तर्गता पंक्तिः पतिता C आदर्शे । 1 ABP वियव्वि° । 2 P जोत्तित्ता । 3 P निच्चलो । 4 ओरोहतुरुक्कतरणीणं । 5 लग्गए । 6 C चलिउं । 7 A छडित्ता । 8 'य' नास्ति P । 9 P °चिय° ।

३०

## विविधतीर्थकल्पे

बंभसंतिणा पउरं सिन्नं विउव्विऊण भंजिओ तस्स बलं । तस्स ल्हासआवासेसु उट्ठिओ वज्जगी । मालवाहिवई कोसकुट्टागाराइं<sup>१</sup> छड्ढिअ पणट्ठो कागणासं ।

अह अन्नया तेरहसय-अडयाले (१३४८) विक्रमसंवच्छरे पबलेणं कप्फर<sup>२</sup>दलेणं देसम्मि भज्जंते, नयर-गामेसु पलाणेसु, जिणभवणदुवारेसु ढक्किण्णसु, जोअणचउक्कमज्जे बंभसंतिमाहप्पेणं अणाहयगहिरसरतंबक्कचक्कं वज्जंतं 5 सोऊण सिरिसारंगदेवमहारायसेणाआगमणं संकिऊण भग्गं मुगलबलं । सच्चउरसीमा वि न चंपिआ ।

अह तेरसय-छप्पन्ने विक्रमवरिसे (१३५६) अल्लावदीणसुरताणस्स कणिट्ठो भाया<sup>३</sup> उल्लूखान-नामधिज्जो<sup>४</sup> दिल्लीपुराओ मंतिमाहवपेरिओ गुज्जरधरं पट्ठिओ<sup>५</sup> । चित्तकूडाहिवइ समरसीहेणं दंडं दाउं मेवाडदेसो तथा<sup>६</sup> रक्खिओ । तओ हम्मरीरजुवराओ वग्गडदेसं मुहडासयाइं नयरणि य भंजिअ आसा-वल्लीए पत्तो । कण्णदेवराया<sup>७</sup> अ नट्ठो । सोमनाहं च घणघाएण भंजित्ता गड्डुए रोविऊण दिल्लीए पेसेइ । पुणो 10 वामणथलीए गंतुं मंडलिकराणयं दंडित्ता सोरट्ठे निअआणं पयट्ठावित्ता आसावल्लीए आवासिओ । मढ-मंदिरदेउलाईणि पज्जालेइ । कमेण सत्तसयदेसे संपत्तो । तओ सच्चउरे तहेव अणाहयतंबक्केसु वज्जंतेसु मिच्छदलं पलाणं । एवं अणेगाणि अवदाणाणि पुहवीमंडले सच्चउरवीरनाहस्स पायडाणि सुवंति ।

अह अलंघणिज्जा भविअन्नय ति दूसमकालविलसिण्ण केलिप्पिया वंतरा हवंति । गोमंस-रुहिरछंटिए अ भवणे दूरीहवंति देवयाओ ति । असन्निहिए पमत्ते अहिट्टायगे बंभसंतिजक्खम्मि अल्लावदीणराएण सो चेव अणप्प- 15 माहप्पो भयवं वीरसामी तेरसय-सत्तसट्ठे (१३६७) विक्रमाइच्चवच्छरे दिल्लीए आणित्ता आसायणाभायणं कओ । कालंतरेण पुणरवि पडिमंतरे पायडपभावो पूआरिहो<sup>८</sup> भविस्सइ ॥

सच्चउरकप्पमेयं निच्चं वायंतु महिमअपमेयं । वंछिअफलसिद्धिकए सिरिजिणपहसूरिणो भवा ! ॥ ३ ॥

॥ इति श्रीसत्यपुरकल्पः समाप्तः ॥

॥ ग्रं० १६१, अ० ३ ॥

1 P छड्ढिऊण । 2 A कप्फर<sup>०</sup>; C कप्फर<sup>०</sup> । 3 C उल्लूखान<sup>०</sup> । 4 P <sup>०</sup>खानाभिहाणो । 5 C D पइट्ठिओ । 6 'तथा' नास्ति P । 7 A B C <sup>०</sup>राओ । 8 <sup>†</sup> एतदन्तर्गता पंक्तिः पतिता C आदशैः ।